



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

4. Kalenderwoche – ab 25. Januar 2009

Dor Umgang midm Geld

Nee, was so jedzde los is mid de Bankn un so... die haddn doch immor de scheensdn un heeschsdn Hochheisor von alle! De Schgeilein von Frangfurd am Main... ee Bankwolkngradzor am annorn!
Die hamm werglisch de Wolkn gradzd un nu duds reeschnen.

Sogahr meine scheene Bank, wo isch immor hingehn du, die hammse jedzde vorkoofd. Un die Bank, die meine Bank gekoofd had, die mussde vom Schdaad geschdidzd wern, dass iborhaubd noch koofn konnde. Un wenn dor Schdaad nisch geschdidzd hädde, wern se alle beede off de Schnaudze gefalln! Das muss mor isch ma vorschdeln... was da los is! Ooch bei die annorn Bankn!
Was hamm die denne die ganzn Jahre so gedriehm? Wie sinn die denne mid dähm Geld umgegang, was dähnen gahr nisch geheerd! Un was die alle vordierend hamm... in die Bankn... schon de Lährlinge hamm abgesahnd. Ma ganz abgesähnd von de Menedschor ganz ohm!

Nu, weeiß isch bloß nisch, was das alles am Ende fiehr das bißl Geld, was isch so off dor Kande hab, bring dud. Die eene Rendnvorsischorung die isch hab, die is schon jedzde bloß noch de Hälfte werd. Weil die irschendwie mid die Bankn un Fongs un so zusammhäng dud. Odor mid dor Börse.
Was weeiß isch! Wo isch die damals hab abgeschlossn, die Vorsischorung, da hammse gesachd, dass isch nu bloß wardn muss, bis isch dann reich bin. Busdekuchn!

Abor die Rendnvorsicherung kann sich erholen, sachn die von dähr Vorsischorung. Wenn sich de Börse erholen dud. Un de Börse dud sich abor bloß erholen, wenn de Wertschafd nisch in de Griese komm dud. Un de Wertschafd is noch gahr nisch rischdisch in dor Griese drinne. Die dud noch am Rand rumdaumeln. Abor wennse schderzn dud...

Also, isch hab meine Rendenvorsicherung schon abgeschriem. Ja, das is meine brivade Vorsorsche gewähsn. Weil doch de schdaadliche Rende ooch nisch so sischor is, wiese immor gesachd hamm. Wobei misch das mid dor schdaadlischn Rende nisch so sähr gewundord had - isch meene, dass dor Schdaad keene Ahnung had, wie mor midm Geld umzugehn had, das is glahr! Abor dass nu de Bankn zeischn dun, dass noch viel wenischer Ahnung gehabbd hamm, midm Geld umzugehn, das dud misch eschd erschiddorn. Isch zweifle jedzde ernsthafd an dähm Grundfesdn des Gabidalismus! Na, is doch wahr - wenn jedzde dor Schdaad de Bankn reddn muss un de Wirtschafd vorschdaadlischn... sogahr de Bornobransche dud nach schdaadlischor Hilfe schrein!

Wobei, die kenndn se nu werqlisch eenfach absaufn lassn!

Jednfalls dud mor sisch doch werqlisch langsam frachn, ob das mid dähm Sozialismus werqlisch so ganz falsch gewähsn is. Villeischd ehm doch nisch? Im Sozialismus isses ja bloß annerschrum gewähsn, als wie im Gabidalismus. Im Sozialismus hammse erschd de Wertschafd vorschdaadlischn un dann Schdigg fiehr Schdigg ruiniert; im Gabidalismus dun se erschd de Wertschafd ruiniern un dann vorschdaadlischn!

Eduard Sachsenmeyer